



Rabu, 20 April 2022
Ogen : Kuan-Kuanen 14: 1



Kepentaren Diberu



Sada artikel i bas fimela.com Jakarta nuratken lit pitu keblehien diberu si mawen kurang isadari, emekap: i bas suhu si rendah, leblehien gegeh dinggen daya tahan diberu bandingken dilaki, ngaturken perduiten beluhen diberu asangken dilaki, komunikasi si lit i bas diberu ulin asangken dilaki, ngelawan infeksi i bas daging, gegehen diberu asangken dilaki, diberu gedangen usiana asangken dilaki, diberu ngasup ndahiken dahin dilaki, tapi dilaki labo ngasup ndahiken dahin diberu, jingkatén diberu asangken dilaki. E maka payo kal bagi si isuratken i bas Pustaka si Badia, diberu ijadiken Dibata guna nampati dilaki. Nampati ijenda lago perkara gegeh tapi cara rukur pe.

Adi si inget ku bas liturgi pemasu-masun asum kita ipersada ras teman geluta. Kata "pekena-kena jabundu" e itujuken man si diberu. Kai ertina? Adi sikap jabu, e banci jadi ban kepentaren si ibereken Dibata man si diberu. Tapi adina runtuh jabu e, la sikap jabu e esituhuna si diberu kap la beluh bas jabu e. Istilah Salomo bas oratenta sendah ban kemotun diberu kap maka runtuh jabu.

Adi bage, seh kal pentingna diberu e selaku nande eme moria GBKP tetap mindo gegeh ras kepentaren man Dibata i bas ngaturken jabuna. Alu bage jabunta e tetap sikap, amin gia lit pe tantangan, perbeben si nderpa kegeluhen jabunta, tapi tetap ngasup ngalakenca alu gegeh si rehna i bas Tuhan nari. Moria bas jabu nge ngaturken kai si man paken (terkait ras hari konsumen). Moria nge si nentukenca asakai si banci ipake, bagepe moria kap si beluh erbahan sukat-sukat perbeliten si man paken. Alu bage i bas jabu nari enggo sikap iaturken alu mehuli. Kai dage ulu kepentaren e? eme kata Dibata. Kata Dibata ngajari kita segelah tambah warina tambah pentarna.

Moria si pentar beluh ngaturken jabu alu mehuli